

ALL NATIONS GOSPEL PUBLISHERS



www.angp-hb.co.za



info@angp.co.za

El Corazón del Hombre

o

EL ESPEJO ESPIRITUAL DEL CORAZÓN

(Una representación alegórica en diez cuadros)

Este folleto con sus ilustraciones tuvo su origen en Francia en 1732. Es conocido como el “Espejo Espiritual del corazón”, o “El libro del Corazón”, y debido a su verdad y valor espiritual profundo, ha estado y aún está en circulación prácticamente en todos los idiomas europeos y es leído por toda clase de gente de todos los credos.

Adaptado a la vida y pensamiento actual, este pequeño libro se introduce en los hogares actuales con el deseo que muchos vayan a experimentar la verdad de la promesa de Dios: “Os daré corazón nuevo, y pondré espíritu nuevo dentro de vosotros” (Ez. 36:26).

J.R. GSCHWEND

COPYRIGHT

ISBN 1 - 919852 - 41 - 7

E-MAIL: info@angp.co.za

ALL NATIONS GOSPEL PUBLISHERS

P.O. BOX 2191, PRETORIA, 0001, R.S.A.

(Esta Mision Cristiana de literatura se sostiene con ofrendas)

(Reg. No. 1961/001798/08)

Aints tunau takauka Yus umirkatnun chichamnasha umiatsui. Turua asa Yuse chichamen umirtsuk pujakka tuke tunau takaavai.

Kristu tuke aintsu tunaarin mash esakartas vantinturmakmia-ji. Kristuka pengke tunaarinchavaitai. Atumsha nusha nekarme.

Aints Kristu inintimias pujakka tuke tunau takaatsui. Antsu aints tunau tuke takauka: Kristu tu avai, tutsuk pujavai. Turuasha Kristuncha nekatsui.


Uchichir irunutiram, chikich ainou atumin anangkramavai, tusan anangkartin chicham antukairap. Kristu nekas pengkeraitai. Turua asamtai aints pengker a nuna takauka Kristua nunisang pengkeraitai.

Antsu Yus aintsun najantsaing, ivianch tuke tunauringin pujumiayi. Turua asamtai aints tuke tunau takauka ivianchnavaitai. Turua asamtai ivianchi takatri mengkakarti tusa, Yuse Uchiri Jisu Kristu tamiayi.

Yuse aintsri ainou Yusnumia akiinou asar, tunaunaka tuke takainatsui. Turua yamaram inintimaun jukiaru asar, turua Yuse uchiri asar, tunaunaka tuke takaschatnuitai.

Yachikita Yuse uchirisha? Turua yachikita ivianchi uchirisha? tiri nekaatnuitji. Aints pengker a nunaka takachuka turuasha chikich ainoun aneachuka nekas Yuse uchirinchuitai.

1 Juan 3: 4-10



1. NU NANGKAMTAIK AINTSU ININTI NAKUMKAMU

Tunau aints ainau ininti ivianchi kakarmari piatkamu ainavai. Ju nakumkamuka tunau ainau inintintai. Aintsu ininti tunau asar, nu inintikia pase aa nuna aintsun inintimtikui. Turua asamtai aints ni inintin ivianch piatkamu asa, tuke musach venaksha pase aa nuna turinak ivianch vakera nunisang pujui-navai. (Ejesiu 2:2)

Nu nakumkamu aa nuni aintsu ininti itur ava tusam jista. Aintsu inintin tunau piatkamu asa titiü pujatsui. Nuka inintijai

varing achat mash tunau aa nuna inintimui, taku tavai. Turua asa nu aintsu inintin Yuse Vakani atsavai. Nuniasha nu inintimau aints ni inintinia jiki, pase aa nuna najanati tusa, turua chicham pase aa nuna titi tusa inintimtikui. Nu inintikia tunau pujau asa, aints Yusen inintimrai tusa tuke ayamtsuk aintsun pase aa nuni inintimtikui. Ju inintinam ivianchi juuntri Satanás nartin pujus, ni aintsri ainaujai aintsu inintin pase inintimrati tusa tuke inak pujavai. Ninu aintsri ainau kuntinua tumau turua ikiamia pachim ainava tumau ainavai. Nu ainaujai ivianch aintsu inintin pujus aints pase inintimrati tusa, aintsu inintin tuke inak pujavai.

Aintsu inintin papu ujuke esaram nuna yapar juunta timianu pujavai. Chikich nanamtain ainu nuna nangkamas nekapma-mui. Aints ningki inintimias: Vikia timia juuntaitjai, turuasha timia nekau aintsuitjai, tu inintimias puja nuvaitai. Nunia kuikiartin ainu ni kuikiarin jisar varainavai. Aints ningki inintimsar: Timia pengkeraitjai, tina nunaka Yus pengke nakitavai. Turua asa nuka paseyaitai, Yus tavai. Nu tunauka aints ainu inintin unturi yujavai. Turua nu yujaru asamtai, ni turuamurin inintimsar turuasha ningki inintimtumasar timia pengker aintsuitjai, tu inintimtuminavai. Turua chikich ainaun suvirpiaku jinavai. Turua chikichnasha nu tumatirin utsuinavai.

Aintsu inintin chipua tumau nuvan tuke vakerau asa pase pujavai. Nunia aintsu inintin kuchia tumau yutanak varing achat mash inintimtikia turua nampetan inintimtikia nuvaitai. Aintsu inintin puvachia tumau pujavai. Nuka pengker inintimtsuk turua chikichnau aa nuna vakerinak aints pujuina nuvaitai.

Napi inintinam puja nu inu Apari nu nangkamtaik Atán nartinun Yus najanamia nuna anangka pengker inintimsar pujuinaun pasemamtikiar tunau avajsamiayi. Nuka aintsu inintin pujau asa aints inintijai ningki inintimias varing achat vai chichamnasha inintimtikia nuvaitai.

Yavaaya tumau inintinam puja nuka kajen puja nuka aints maatnuncha pase turuatnuncha inintimtikui. Nu yavaa kajeak aints pase aa nunasha turuati tusan aintsun inintimtikui. Kungkuimia tumau nusha avai. Nuka tuke nakimiamun inintimtikartavai. Turua aints pengker inintimnuncha pase-mamtikui.

Yuse Vakani timia pengker aa nu aintsu inintin tuke engkematas vakeravai. Turua Yus aintsun timia aneau asa: Vina Vakanur ami inintimin tuke paantin ji kapava tumau ati, tusa vakeravai. Turuayat aints Yusen seatsuk pujaka, inintin tunau piaku asa, Yuse Vakani engkemachmin tsuimiar turuasha muimiar tsutmai pujau asamtai engkemtsui. Turua ivianchi kakarmari inintinam piaku asamtai engkemataatkama tujintavai.

Yuse avemamuri pengker aa nu aints ainau tunaurin inintimiar shintarua nunisang inintimrati tusa inintimtikui. Nuni Apaachiri chichamejai ivianchin nepetui, nunia Yuse seavai. Turuayat aints ainau vait chichaman chichau asar, ninu vait chichatiri napi tseasria tumau asar, Kristu timia pengker aa nunaka nakitinavai. Ninu inintin tunau piatkamu asar tuminavai. Nu inintimauka aintsu inintin tunau piyatkamu asa, ivianchi kakarmarijai aintsu ininti tuke nepetkamu ainavai, turua tuke musach pujuinavai.

Aints ainaunam nu tunau inintimau varutmak aintsu inintin pujuinava? Chaa, nuka pengke nekaachminuitai. Turua nunia Kristun umirnitjai, tinayatang tuke tunau asar, ivianchi aintsri turua tunau ainavai. Turua ivianchi juuntri inatiri ainavai. Yuse umirnitjai, tinayatang tunau asar jakatin ainavai.

YUS SEAMI

Yusru, Amek timia juun asam mash najanamiamme. Turua ameketme in uventikramratini. Ami jimijai vi pase turutirsha jirtusta. Ami paanurmijai turua ami jimijai vina inintir paantin avajtursata. Tunau asan vina inintirun teeya nunisnak inintimaur paantin avajtursata. Vina inintirun tuke amijai pujustasan vakerajai. Turuam ami Vakanim surusta. Yanchuik turutinka turuashti tusam uventikrurta. Yanchuik tunau turutirun ataksha vaketruckhati tusam, turua tunau vakera-murin inaisati tusam ame uventikrurta. Yusru, vina inintirun tunau a nuka timia shamrumtinuitai, tusam turua aints tunau turina nuka tunau aintsrintai, tusam turua ivianchnavaitai, tusam turua ivianchi uchirintai, tusam nekamtikruata. Turua vina inintirun tunau piaku asa, inurua tumau atsuash, turua inintirun pasemamtikratsuash. Nuka vina inintimaurun paan inintimtikrurta. Apuru, ameketme ju nungkanam mash aa nu najanamuka turua vina inintirsha aminu ati, tusam ame najana-

miame. Ami inintimaurum timia pengker asam, vina pujutir ati, tusam inintirka najanamiamie. Turua asamtai vina inintirun ame pujakminkia, itur visha inintirun ataksha ivianchnau ati, tusamsha ivianchin tsangkakatatjak? Yusru, ame timia juun asam, ivianchi kakarmarinia uventikrurta. Turuam angkantin avajtusta. Turua tunau inintimair japitruurta. Vina inintir pase inintir turua tunau inintir ame jurutrukta. Vina inintirun yamaram inintimau najatruata. Turua amek vina inintirun Yuse Uchiri pengke tunarinchau nayaimpinam puja nu pujusti, tusam inintirun ame umista. Turua vina inintirka ami jeemia tumau ati. Maaketai.

Chaj taja: Vikia inintinchau asan, vait chichaman antuku asan, nu pengkerapita tusan, untsuri musach pujuyajai. Yusnumka jeachmin arák vekava nunisnak vekakun inintirun tunau pase aa nu piatkamu vekainuyajai. Chikich aints Yuse umirkachu ainau Yusrinchava nunisang pujuina nunisnak visha pujuyajai. Turuayatun vikia varukamiaja. Apuru, ame vina tunaur mash nekau asam ami chichamijai untsurkamiamie. Timia vait vajamur nekau asam vinaka Apuru untsurkamiamie. Maaketai.

2. YUSE SEAMTAIKIA, AINTSU ININTIMTAIRI VARING ACHAT ININTINMAYA TUPIKIAVAI

Yus ni Vakani timia pengker aa nuna akupturmaku asa, aints ni tunaurin inintimiar tunauro vainua nunisang inintimrati tusa, turuasha yamai akinava nunisang timia metek inintimrati tusa nekamtikui. Ii tunau nepetkar ii tunauro akimiakua nunisrik vajastinka saapiya tumau ere avai. Ii vait vajaktinka inintinchau pujamu turua jakar vait vajaktin nunaka ni chichamejai nepeteavai.

“Nusha inintimrataram: Yus aints ainaun inartata nuna pujutirin Yuse umirkachau ainau pujuschartatui. Atumkeka anangmamavairap. Yus umirkau asaram, Yuse umirkachua nunisrumek pujuschatnuitrume. Nuva nuvatsuk takau ainau, nunia aintsun ninumsuk nijai kanurtas vakerin ainausha, nuniausha Yuschau vainiatang, ameketme vina yusur, anentrar tinausha, nunia chikich aintsu nuvarin kasaminausha, nunia aishrin ajapinausha, nunia mai aishmangtak nijinin ainausha Yus pujamunam pengke jeachartinuitai. Nunia kasamtan

unuimiaru ainausha, turuasha kuikian nukap vakerin ainausha, turuasha chikich ainaun pachisar pase chicharin ainausha, turuasha kuikian vakerinak anangmin ainausha Yusnumsha pengke jeachartinuitai.” (1 Kurintiu 6:9-10) “Turua asamtai tunau aa nuna takau ainau mash jainak vait vajamusha atinuitai.” (Rumanu 2:9)



Aints tunau asa, vait vajaktinumapi vetinuitja tusa, shamak inintimiar vina inintirun tunau atsuash, tusa inintimratnuitai. Aints tu inintimkungka ni inintin Yuse Vakani pujaun

nekapmamsui, antsu vikia tunavapitja, tusa nekapmamui. Turuasha ninu inintin timia tsumiar turuasha tsutmain pujaun nekapmamui. Turuasha Yuse Vakani timia pengker aa nu turua nangkamnak Yus sukarta nuna inintimiar, Yuse Vakani jukinka ni arut inintimairin inintimiar ninu inintina pase aa nuna vainui. Turua tunau turutingkia timia natsanpiakuitai, tusa nekavai. Turua inintinam pujus nu tunauka najamavai, turua najamak aintsun vaitkiavai. Aints nu tunau nekaa pengke tsutavai. Turua asa ju tunau inaisan vári angkantin vajaschajash tusa vakeravai. Ni yanchuik turutirin inintimias nu turuamujai pujaka kakaichau nekapmamui. Vikia tunau aints asan tu pujuyajai, tavai. Nu tunaujai pujakun jakava nunisnak pujamtaisha, yaachia vinasha .angkantin avajtustinuita? (Rumanu 7:24) Aints ni tunaui ukuktas, turua tunaui inintimias vake mesek pujamtai, Yuse Vakani nu aintsu inintin ji kapava timianu paantin vajas engkemtavai, turua kakarmarin suvak tuke kakamtikui. Pengke arutsuk Yuse paanuri turua ni Vakani ningki engkemtavai. Ivianchi apuri Satanás nartin ni aintsri nemarkin pase ainaujai vári tupikiaktias vakerinavai. Nuka aintsu inintin Yuse paanuri turua Ni Vakani vinamtai shamak tumavai. Aintsu inintinia tupikiakin asa, pengke natsanpiaku inintimtumavai. Inintinam ikiamia pachim ainava tumau ainauka mash shamkar jinkiar tupikinavai. Pase inintimtikartin inintinam pujausha mash mengkavai. Yuse paanuri inintinam engkemamtai, inintinam tee ausha mash mengkak paantin vajavai. Turua asa inintinam yamaram kintia tsavarua nunisang paantin vajavai. Turua nuvik tee amia nuka tuke mengkavai.

Yuse pengker Vakanningkia Yuse paanurintai. Antsu tee amia nuka, turuasha kintamrava tumau amia nuka aintsti tunauintai. Iikia tunau asakrin, Yuse Vakani aintsti inintin engkema in uventikramratas engkemmatnuitai. Yuse Vakani iinu inintin engkemak ivianch ninu kakarmarijai iinu inintin yavikmavau aa nunaka pai tusa ivianchin ajapatnuitai. Turua Yuse Vakani pengker aa nu ii kajetai inintinam aa nunaka turua tunau aa nunasha mash papeer, nuniangka Yuse Vakani iinu inintin pujus, vaitchirin pak epeni ivianchkia engkemachmin vajas, antsu Yuse Vakani ningki pujustinuitai.

Aints ainautiram! Yuse paanuri anetaram. Yuse chichame armavana nekaskepita titaram. Pase aa nuka tsutrataram.

Ivianchi inintimin puja nu ajapataram. Turuaram tsutrataram. Turuakrumningkia atumi inintinia jinki tupikiaktatui. Ju nunghanam aa nuna jisan vakerutai tusaram, atumi ji mitsumatararam. Turua mash aa nu jisrum vakerukairap. Antsu vina inintirun Yuse Vakani timia paantin aa nu engkemrutati tusaram, atumi ininti uraitaram, turuaram maaketai tusaram pengker avajsatararam. Yus atumin Ni Vakani akupturmaku asamtai, vina inintirun tunau aa nuna piaku asan, teeya nunisan pujamunka mash jinkiti tusaram, nuka tsangkatkataram. Ivianchi juuntri Satanás nartin turua jinam vai vajaktinum vina juruktin inintirun puja nuka jinkiti, tusaram nuka turuataram.

Vina inintirun tunau atsatsuash, tusaram inintimraram nu tunauka inaisaram, turua tsutakrum muimra tumau inintimtakrum nu tunauka inintirnija jinki yajaj nisha arák pujusti tusaram, nuka turuataram. Yuse paanuri tuke atumin nakarmaj pujana atumin suramsatatrume. Turua atumi inintin Yuse Vakani vári engkemturmatatrume. Atumi inintinka vai uramua nunisang urai paantin vincha vajas, pengker inintimias atumi inintin pujustatui. Nu Yuse paanurijai nekas atumi inintin pachim pujuarmia nuka paan: Varimpita, tusaram nekatnuitrume. Nu nekaram mash inaisaram angkantín vajasrum atumi pase turutirisha inaisaram, tunau takatrisha inaisaram pujakrumin, Yus ni Vakani aints kakaichau ainaun suvak timia pengker inintimtikiana nunajai atumnasha timia tunau arumning, ni kakarmarijai angkantín avajtamas atumnasha uventikramratnuitrume.

YUS SEAMI


Yusru, ami Vakanmik timia paanuitai.

Ami Vakanim paantin aa nuketai. Ami chichamem timia pengker aa nuke vina tunaurunka nekamtikruatnuitai. Ami paanuram-turua ami pujutrum vina inintirun engkemturati. Tuke pujamtaisha vijai pujusti tusam, Vakanim inintirun surusta. Ameka tunau ainau jakar vai vajaktinum vearti, tusamka vakeratsme. Turua vinasha nunismek vai vajakti, turutsume. Turua asam ame nekas iviaku pujame. Ami vakeramurmikia vi amijai pujamu ati. Turua tunauruka Ame nekamtikruata. Nu tunauka vina tuke inaitutsuk ataksha ivianchi inatiri ati, tusa vakerutavai. Ami Vakanim tunau

ainautin uvemtikrati, tusam akupkamiarena nu vina inintirun vayati. Inintimaurun tunau inintimtikrak vaitkara nu, nunia jakar vait vajaktinnun vina jurutias vakera nu ivianch ukurkiti, tusan vakerajai. Ivianchin chicharkun: Yamaikia aminuchuitjai, takun antsu yamaikia Yusnavaitjai, takun nepetkatasan vakerajai. Yusru, Ami Vakanim surusta. Vina inintirun shintarua nunisnak inintimran nuka ame vakeramuram ati. Turua varasar pujamu nekamtikruata. Turua Ami Vakanim in akupturmakmiame nuni pengker inintimtikurta. Vina inintirun tunau ataksha vaketki pujuschatu tusam, nuka vina inintirun turuata. Ivianchi juuntri Satanás nartin vini vaketkishti turua anangkruashti. Turuasha inintirun ataksha vaketki apua nunisang yamaikia pujuschatu. Ami nekamtairun nekas paantin. Turuasha iviaku aa nu turua nekaskea nu surusta. Tunau turuamujai uvemratnuka atsavai. Antsu tunau turuava nuka ivianchi aintsrintai, turua teenam pujusar turuasha jinam pujustinua nuna uchirintai. Vina chichamrun tuke kajinmatsuk inintimias pujusti, turuta. Aints pase inintintin ainauka Ame pujamunam pengke jeashtinuitai. Tunau ainau Ame pujamunam pengke engkemashtinuitai. Ju nungka Ame amuktin jeamtai, turua vait vajaktin jeamtai, jinam tunau pase turin ainau mash veartatui. Yusru, tunaurn inintimiar ukukti, tusam yainkata. Turua tunaurn tuke mash inaisati, tusam yainkata. Tunaun ami kakarmarmijai nepetkatjai. Amin yamarna nunisnak akinan aminu vajasamtai, inintir japitruata. Turua teenam pujamunmaya angkantin avajtusta. Ami vakeramuram vina inintirun metek ati. Inintirun Ami Vakanim paantin pujakun turua Amijai tuke chichakun tuke mash pengker avajsatasan vakerajme. Maaketai.

Vikia yanchuik nangkamin timiajuitjai tinu asan, vikia mengkakava nunisnak pujumiaja nuna nekajai. Vina pujutrun pase aa nuni turuamijai. Tunaunum vayamijai. Yamaikia Apuru Amin vaketkitasan vakerajai. Vina tunaurn yamaikia inintimrajai. Vikia Amin nakitakun vi surukua nunisnak pujumijai. Vikia uchi asanak tuke nampuarkuncha tu pujuyajai. Ami chichamin tunau ainautin sukartusmau avai. Amin vinakun tunaurn inintimramijai. Inintinchau asar, Amin mantamavar, Ami vejmakrumin kuikiajai nakurusarmia nusha tsangkuratnuitme. Tunau vajasarussha tsangkuratnuitme. Nuna tunaurni tsangkuramka nuniangka nu aintsu tunaurni

inintimsam pujuschatnuitme. Antsu tunau turuachua nunismek nu aints inintimsam pujustinuitme. Vikia Apuru Jisusa, tunau aintsuitjai. Juni pujajai Apuru. Vi seamujai Vakanim inintirun piatrukta. Ami arákrum inintirun nereku ati. Iin uvemtikramra-tin asa, timia pengkera nunau atajai. Ami numpemjai vina tunaurun japitrurtin avai. Nunajai inintirun tunau asan, pujamurnasha shiiram pengke tunaurinchau avajtustinuitme. Maaketai.



3. KRISTU NEKASKEAPITA TAMATAIKIA, TURUA KRISTUNU ATAIAI; TUSA KRISTU UMIRMATIKIA YUSE VAKANI TUKE NINU ININTIN PIATKAMU PUJAVAI.

Tunau aints yamaikia Kristun umirui. Nuka tunaurin inintimiar, nunia tunaurin nekapmavar vake mesek pujustinuitai. Turua Yusnum uyumatsuk pujustinun inintimias turua Yuse anengkratairin inintimias jutancha jutinuitai. Ninu inintin initiak najamava nunisang nekapmamui. Yanchuik inintimairin Yus yapajtuamu asa, ni amikrijaisha kajernaitairin inintimiar, turuasha Yusrinchava nunisang tuke pujus, antsu Yuse nemasea nunisang ivianchin umirak pujusu asa, nuna inintimiar vake mesektinuitai.

Turuayat yamaikia Yuse pengker Vakanin in akupturmakmiji. Yuse chichame paan vainak aujas nekas Yusen pengker umirkatnuitai. Aints untsuri Kristu umirin ainaun kajernusha turua Kristu umirun maincha irunui. Turua inu Apuri rinusha mash tunaurin tsangkurar angkantin pengker avajsatnuitai. Turua ii Apuri Jisus, aints Yuse umirkacharu asar, ininti mengkakau ainauncha vina umirtukarti, tusa yayavai. Turua tunaurintin asa sungkurmakua nunisang pujamurinja mash ajapravai. Yuse avemamuri turua Yuse pengker Vakani aintsun vinitui. Turua Yuse chichame Jisu Kristu krusnum jakamia nuna inintimtikui. Ninu chichamejai paan antumtikui. Turua pengker avajas, Yuse Uchiri tunau aintsun uvemtikratas ju nungkanam taramiayi, tusa turua Kristuka atumin yamaram pujut nayaimpinam tuke jatsuk pujustin jukiram vijai pujustaram, tusa jarutramkamiarme, tusa chicharui. Turua asamtai ininti mengkakau ainaun nuna nekamtikia ni tunaurin natsanpiaku inintimtikiar Yus umirkatnun Kristu jakau asamtai, ii tunaurincha tsangkutramratnun turua uvemratnun inintimtikui. Aints tunau ayatang, Kristu umirak Kristu nekasampita tusa, Kristun: Ameketme pengker, tamataikia nu aintsnasha Kristu pengker avajas ninu Vakani nekas pengker aa nuna turua nincha uvemtikratas jakau asa, ni Vakanincha akikchaujai turua kuikiachujai suvavai. Turua asamtai nu aintska Yuse Vakanin kuikiachujai juvavai. Turua asamtai Kristu umirkau ainausha nunisarang Kristu Vakani nekas pengker aa nuna tuke pujustinun juvinavai. Yuse Vakani aints tunaurin tuke ukukiaru

ainaun nu aintsu tunaui mash tsangkuramuitai, tusa nekavai. Turua yamaikia Yuse uchirintai, tavai. Yuse pengker Vakani nu aintsu inintin piyatat, angkantin turua pengker inintimsar pujustinasha inintin piyatui. Turua asamtai nekas Yus pujamunam iin juramkitas aa nuka nu aintsun vinitui. Ni nekas tunau asa jutmia nunaka yamaikia tunaui inintimias jutchatnuitai. Antsu timia tunau ayat, tunaunumia uvemrau asa, turua ni inintijai vara, maaketai tusa, turua ni inintin Yuse pengker Vakani nekas piyatamu asa, maaketai tusa, tuke varaak nunaka tumatnuitai. Nu aintska turua ni vakanisha tuke varavai, Yus pujava nuni inintimias.

Ju inintinam Yus ni Vakanin iin suramsamiaji nu nuni ji kapava timianu paantin avai. Nin uvemtikratin ni inintin puja nuna nemase ivianch ainu, pachim ainu, ivianchi juuntri Satanás nartin ni inintin pujuarmia nusha mash mengkavai. Ju aintsun Kristu nekas pengker avajsamuri Kurintunam pujuina chicham akuptukmaunum paan nekatnuitai.

“Atumjai pujuinau tu puju armaiyi. Antsu yamaikia ii Apuri Jisu Kristu umirkau asakrumin, Yus atumi tunauiin japitramramiyi. Turuasha ii Apuri Jisu Kristu: Vinar ataram tusa, turua pengke tunaarinchauva nunisrumek ataram tusa, pengker avajtamsau asamtai, Yus ni Vakanin atumi inintin engketramamiyi. Turuasha ii Apuri Jisu Kristu atumi tunauiin akimiak mash esakarmiyi.” (1. Kurintiu 6:11).

Yuse Vakani timia paantin turua nekas pengker avajsamu aa nuka tunau aintsun Yus tsangkuramuitai. Nu aints ni inintijai Yusen inaisachmin inintimu asa, Yus juuntaitai tusa, tuke inaitsuk Yusjai varavai. Yus ni Vakanin susamu asa, ninu inintin tuke varavai. Tuke mash vina inintirun Yuse Vakani ni anengkratairi inintirun piatrukki, tusa vakeravai. Yuse Vakani inintin piatkamu asa, ni Apurin: Ameketme juuntam titas vakeravai.

Turuayat ikia tuke anearar pujustinuitji. Iinu Apuri nuke inintimsar pujustinuitji. Turua asakrin iinu inintin pachim irunmia nu turua ii tunauiinkia inintinmaya jinkiar pujuinavai. Turua ivianchi juuntri Satanás nartin iinu inintin pujutiat ni kakarmarisha mash mengkavai. Turuayat araka pujatsui. Mash inintinam pujuarmia nuka araka vetsuk iin ayaamas pujus, kashisha tuke turua tsavaisha tuke pujus, iinu inintin nuvik

pujumia nuni ataksha vaketkitas tuke vakeravai. Iinu inintin pujuska apua nunisang pengker pujutiat, inintinmaya jikir, ajapamu asa, pasenum pujak, ataksha vári vaketkitas vakeravai. Turua asamtai shintartaram. Turuaram Yus seataram.

YUS SEAMI

Ameketme pengkeram, Apuru. Ami Vakanim timia pengker aa nuna inintimsan tuke amijai varastinuitjai. Ami chichamin etserkun, ami vakeramurmin turuakun, aminka tuçe varamtik-satatjame, Apuru. Ameka krusnum jakam, turua nukap numparu asam, ni tunaurin inais, tunauri tsangkuramu ati, tusam vinaka krusnum jarutrukmiame. Turua asam nunismek nuka vina inintirun ami chichamen aarmava nunismek surusmame. Ami Vakanim nekas paantin aa nuka inintirun surusmame. Apuru, vina vakanruka ami Vakanimijai tuke pujusti. Turua ami jimijai vina inintir jirtusta. Ami Vakanim inintirun piatrukamtai, ami Vakanim nekas pengker aa nuna mash nekatasan vakerajai. Ame krusnum jakamurmin yamaikia ami chichamijai nuka nekamtikruata. Timia iturkachmin aa nuka, turua timia nekachmin aa nuka vina tunaur ame tsangkuturmiame. Yanchuikia vikia vina inintirun ivianchi jea tumau pujuyajai. Turuayat yamaikia vina inintirun Yuse Vakani yeentai. Nuvikia vina inintirun ivianchi kakarmari piatkamu asan, ivianchi kakarmari shamai pase aa nu piatkamu pujumiajai. Turuayat yamaikia varamtikrusu asakmin tuke varajai. Yanchuikia vina tunaur inintirun pase inintimtikrinuyayi. Turuasha vinaka ivianch tuke akuptukchamin achirkau ayayi. Turua ayatun yamaikia nuna inintirun nekapeatsjai. Antsu Yuse Vakani inintirun pujaun, turua pengker inintimtik-raun, turuasha vina varamtikraun nekajai. Vina inintirun ni nemase ainaunka mash jiki akupak nekas angka pujavai. Vi tunau asamtai, ivianch ni kakarmarijai jingkiata pujuya nunasha mash atitamiayi. Turua asan angkantin yamaikia pujajai. Turua Yuse anengkratairi yamaikia vainkajai. Vinaka ame nekas pengker Vakanim surusu asakmin: Ameketme pengker, tusan tuke aminak varamtiksatatjame. Vina jangkerjai tuke ayamsuk amin naarmin pachisan kantamkun: Ameketme juuntam, titatjai.

Iin uventikramratnu Apuru ami Vakanim seajme. Ame ukurkip. Turua ami uvejimijai achirkata. Yusru, ameketme iin

uvementikramratin. Yusru, ami jintim itur ava nu unuiturta.

Vikia nuna nekan, ami jintimin nekas iviaka pujustinum jeaka nuni vekasatatjai. Vina inintir pengker avajtursata. Ami narmin pachisan: Ameketme juuntam, titasan vakerajai. Vina vakanturun ataksha ivianchin pengke tsangkatkashti, tusam vina inintir ame ukurtusta. Antsu tuke kintia metek amijai pujustasan vakerajai. Ataksha vaketki tunaunum jeai tusam, ame vaitkata. Vina inintirun ami naram aarmava nunisang ati. Turua tuke pase aa nuna vina inintirun pujustas vakeraun kajerin ati. Turua tunau turutinha mash papen ati. Turua vina angka avajtusmeka ataksha tunaunum vaketkiti tusamka tsangkatnukaip. Turua asam inintirka nekas pengker avajtursamame. Turua ame inintirka tunaunum pengke vaketkishti tusam, vina inintir ame ukustrusta. Antsu inintirka ami jeemia tumau asa, ami Vakani jee ati. Turua nu ami Vakanmijai inintirun tuke varamtikrusta. Maaketai.


Ju nungkanam ni uyumatsuk pujamur avai. Nuka Yus vina inintirun tuke ni paanurijai kintia metek paantin puja nuvaitai. Vina Yusruk pengker angkantin avajtustinuitai. Tuke pengker inintimtikra nuka vina Yusruketai. Ninu Vakanin surusu asamtai, tuke maaketai tajai. Turua tuke inaitsuk nunaka tajai.

Ju nungkanam aneamuka atsavai. Yus nayaimpinam puja nu anetnuitji. Ju nungka tunau asa, timia vait anenmai avai. Yus nu nangkamtaik ajan Itin nartinun najanamia nuna pachis kantamaurintai. Vina Yusruk ni Vakanin surusuaitai.

4. AINTSU ININTI KRISTU NEKASAMPITA TINU ASA; CHIKICHNAKA ININTIMTSUI. ANTSU JISU KRISTU KRUSNUM JAKAMIA NUNAK ININTIMUI.

Tunau ainau tunaui tsangkuramuitai. Turua Yuse Vakanin jukin Kristu kursnum jakamia nuna inintimui. Turua asamtai Yuse Vakani yamaikia ni inintin vina pujutirua nunisang ati, timia nu ni inintin pujau asa, Kristu turunamurin mash inintimui. Turua Yuse Vakani ni takatri takastinua nuna Kristu umirin ainau takasarti, tusa yaingtas Jisu Kristu krusnum jakamunam inintimtikui. Yus shiviar pachis Papru timiayi: "Junia pachisan vikia nekajai tusan, timiajuitjai tichamnavaitjai. Antsu Jisu Kristu in krusnum jarutramkamiaji, tusan nuna titinuitjai. Vikia viki inintimtumasan: Vikia timiajuapitja,

tichamnavaitjai. Antsu ii Apuri Jisu Kristu krusnum jarutramak in uvemtikramramiaji, tusan nunaka titinuitjai. Turua asan vikia Kristunu asan, tunau ainsnum surukmava tumavaitjai.



Turua vikia yumi vinangmaunum jakamia nunisnak nunia nantakaua nunisnak ju nungkanmaya ainu vakeramurin inintimsujai.” (Karásia 6:14)

Yuse Vakanijai aintsu tunaurin tsangkuramuitai. Ninu Apuri jakamurijai, nin pengker avajksamurijai, turua ni kakarmarijai ni tunaurincha mash tsangkuramu asa, inintin Yuse Vakani piyatkamuitai. Turua asa, “Yus iinka timia pengker avajtamsau asamtai, yachia iin pase avajtamsatas pujustinuita? Nuka shamkatnukai? Atsa. Yus ni nekas Uchirin nunaa emak iin akupturmakmiaji. Turuamtai aints ainau niin mainamtai, nunaka suritramtsuk iisha Kristunu asakrin, ninu aa nunaka mash itur suramsashtinuitji?” (Rumanu 8:31,32)

Jisu Kristu aints ainau Yus vakera nunisang tunauri inaisar pujusar tusa vakeravai. (2 Kurintiu 5:19) Kristu krusnum jakamia nu ni Vakanin sukartavai. Turua asa isha Yuse Uchirinu Kristunu asakrin, incha itur:au aints naka nekatsjai, turamtinuitji?

Turua asamtai Kristu krusnum jakamia nu ni Vakanin aintsu inintin vinar ati, tusa nuni pujavai. Turua asamtai Yuse umirin ainau Kristujai pujuinauka ninu Vakani tuke kitamtsuk pujustinuq juvinavai. Ni vait anengkratairin nunak juvinatsui, antsu ni kakarmarin, ni takatrin nekas pengker aa nu turuatnun-cha Yus suvavai. Turuasha ii inintin Kristu krusnum jakamia ni Vakanin iin suramsamiaji. Nuka inintin pujau asa, tunau inintimau tuke aintsu inintin vayashti tusa, vainui. Nunaka Kristu aints ainau untsuak timiayi: “Vini vinitasrum vakrakrumka, vikia timianchavaitjai, tusaram vina nemartus-taram. Turua vina nemartakrum, atumi jakatniuri, atumi krusri jukiram nemartustaram,” timiayi. (Matiu 16:24).

“Aints vina nemartustas vakeraayat, jatan shamak ni namangken uvemtikratas nekas vina aintsruchuitai.” (Matiu 10:38) Ami inintijai vakeramuram nepetkata, nunia ami Apuram nuke nekas pengkeraitai, tita. Turua asamtai atum tuke ii Apuri Jisusjai pujustasrum vakrakrumka, atumi tunauri varing achat mash inaisaram, tuke inaitsuk timiatrusrumek umirkataram. Nu turuachkurkia iinu Apurijaiingkia tsaniasar pujuschatatji. (Epreu 12:14).

Aintsti inintin nekas juun tunau aa nunasha mash ii Apuri japitramratatji. Turua ni Vakani nekas pengker aa nuna Yusnau ainautinka iinu inintin piyatramkatatji.

Tuke inaitsuk Yus seakrum ni vakera nunisrumek turuataram. Turua chikich ainau Yuse aintsri ainausha pachisrum inaitsuk

Yus seataran. Turua asamtai nu turuakrumka Yus nekas pengker avajsatnuitrume. Ivianch iin nekapramau Yuse chichamejai nepetkau akurningkia, ii Apuri varamtiksatnuitji. Iin kajertaminamtaisha pase aints ainausha iin pase avajtamsartas vakerinamtaisha, ikia Kristujai pujaji, tusar nekau asar, iin pase avajtaminaun nincha yapajkiataj, tichau asar, Kristu pengker avajsatnuitji. Turua asar iikia mash Kristu pengker avajсарu armi. Chikichik chichamjai ni aneamurinka ni Vakanin susamiayi. Turua asa ni jijai aya jisang, turua aya chichasang mash tunau pase aa nunaka nepetui. Turua ni Vakanġ nekas juun aa nuna aintsti inintir sukartusu asa, ivianchjai maaniaksha ivianchin nepetkati, tusa tuke nakarmaj pujavai. Yachia nepetmaki nuka iinu Apuri pujamunam jea? Ii Apuri ninuri aa nuka mash uvemratatui. Nu chichamka aints ni kuvishijai antinavai. Turuayat nu chichamnaka tuntupeavar ukuinava nunisarang arumak kajinminavai. Turua chikich tuntupea ukutsuk emak juvava nunisang juvinavai. Iinu Apuri Yuse Uchiri Jisu Kristu ni Vakanin iin nangkamnak suramsau asamtai, nuna juvaji.

YUS SEAMI

Vina anetiru Apuru, vina anetiru Jisu Kristu, krusnum jarutruckmiamе. Ame Yusnau ata, tusam inaitukmame. Amin emkin pujajai. Vina inintirun amek pujustinuitme. Ami turuamurmin turua ami jakamurmin inintimsan pujajai. Vina pujutnuka tuke aminu mash atinuitai. Ami Vakanmijai vina uvemtikrurmiamе. Nuka tuke vina inintirun pujurtusti. Vina inintirun ami Vakanim tuke nukap piatrukta. Vina inintimtair ame nepeturkata. Turuam ame inintirun pujurtusta. Ami Vakanim inintirun yamaram avajturas ame inintimena nunisang inintimtikrurti. Turua aminak nekas pengkeraitme, titatjai. Turua ami turunamuram ami jakamuram ame vakerame nunisang inintirun ati. Apuru, ame inintime nunismek inintimtikrurtasam yainkata. Turua nekas aminak vainkau asan, ameketme iin uvemtikramratin tuke titatjai. Vikia timianchau asan, ju nungkanam nungka tsetseria tumavaitjai. Ameka inintirun aa nusha mash timianchavaitai tusam nekarme. Turua ami jakamurmin pachisan titatjai: Vikia Kristujai tsaningkian krusnum jakamijai. Turua asan yamaikia inintirka vinaruchuitai, antsu Kristunuitai. Ja ai, Anetiru Apuru, iin uvemtikram-

ratin asam yainkata. Inintirun katuram inintimtsuk aminak nekasampitai titatjame. Ameketme iinu Apuri. Vina inintirsha amek surusmiame. Ame tunaurchau ayatum, turua timia pengker ayatum, yumi vinangmaunum ame-vaitnamu amiaiyi. Ami Vakanmikia inintirun tuke pujurtusti. Ame krusnum jakam, ivianch nepetkau asakmin, ami kakarmarmijai ivianchin nepetkatjai. Ame krusnum jakau asam, vi tunaunum pujakun, turuasha jakatnunam pujakun, vaitnasan pujai pengker avajtusmiame. Ame Vakanmikia nayaimpinmaya paantin etsantua nunisang inintirun ati. Nuka Apuru tuke vina kakamtikrin ati. Maaketai.

5. AINTSU ININTI, YUSE UMIRKAU ASAMTAI, YUSE VAKANI JEENTAL. TURUA ASA YUSE UCHIRI TURUA-SHA II APAACHIRI YUSE PUJUTIRIA TUMAVAITAI.

Aintsu inintin Yus tsangkuramu ainau Yus ni Vakanijai pengker avajsamu asa, yamaikia ninu inintin iinu Apaachiri Yus, nunia ni Uchiri, turuasha ni Vakani pujavai. Turua ninu inintin iinu Apuri Kristu chichame aarmava nunisang avai. Apu Jisus iin pachitmas ni chichamen tu aarmiaiyi: "Vina anentuka vina chichamrun tuke kajinmatsuk pujustinuitai. Turua vina Apaachir nu aintsna tuke anetatui. Turua vina Vakantrun nin akuptuktatjai. Turua nijai tuke iruntrar pujustatji," Jisus timiaiyi. (Juan 14:23)

Tunauri tsangkuramu turua Kristu numpejai inintin nijiatka-
mu ainauka Kristu ni Vakanin susamia nunak: Maaketai tusar nekainavai. Turua mash ainau anengkratin ainavai. Turua Kristu: Turuataram, timia nuna timiatrusang umirinavai. Turua Yuse Vakani nu aintsu inintin timiatrusang pujavai.

Yuse Uchiri Yuse aneamurintai. Turua ni vakaningkia ni Apaachirin Yusen tuke jiavai. Ii Apaachiri Yuse Vakani inintin tuke pujavai. Ii Apuri inatiri Paprusa tu aarmiaiyi: "Atumi inintingkia Yuse jea tumau asamtai, Yuse Vakani inintimin puja nuka nekatsumek? Yuse jeen chikich yus yuschau aa nu Yuse jeen pujamtaikia, nu jeanka Yus mash ajapatnuitai. Yuse jeenka atumetrume. Turua asa Yuse jeenka pengke tunauchavaitai." (1. Kurintiu 3:16) Chikich aarmaunum paan chichavai: "Ni inintin tuke pujustatjai. Turua nijai tuke vekasatatjai. Turua tuke ni Yusri atatjai. Turua ni inintin vi pujau asamtai, ninu

inintinkia vina jaktarua nunisang atatu." Yus timiayi. (2. Kurintiu 6:16).

Nuniasha ii Apaachiri Yus, ni Vakani, turua ni Uchiri ni aintsri inintin avai. Turua asamtai nin umirin ainautikia nu pachisar pengke kajinmakchatnuitji. Kristu nekas tunauchu krusnum jakamia nu ni aintsrinka tuke ukutsuk nijai tsanias pujavai. Turua ni inintin tuke kitiamtsuk pujustinum suva nuka ni Vakanintai. Turua asa timia pengker inintimias, ni Apaachirin jimias, ni Uchiri Jisu Kristu Vakani ni inintin pujavai. Turua Yusjai tuke kanakchamin tsanias pujau asamtai, turua ni inintin Yuse varamuri nukap piatkamu asa, yanchuik tunaunum pujutirin inintimias: Visha timia tunau ayatnasha Yuse Vakanijai nekas varastinnasha itur jukimiaja? tusa inintimui. Turua ni inintinia nu inintramu aimkatnun inintimui. Kristu krusnum jakamia nu Yusnumia akupkamu vina uventikrurtas vaitnas jakau asa, vinar ata, tusa inaitukmiayi. Turua asa tunaunum, ivianchi kakarmarincha, vait vajamurnasha mash ajaprutamiayi. Turua ni Vakanin vina uventikrurtas tsangkatrukmiayi. Ninu Vakani uventikramia nuka viyapitja, tusa nekavai.

Yanchuik Kristu umirchau asa, nu nangkamtaik ni inintin ninu tunaunum unturi pujau asa, turuasha nu tunaunum jakatin amia nuka ivianchi juuntri Satanás nartinu nuna takatri turuatnun turinuyayi. Turuayat yamaikia ii Apuri Kristu ni Vakanin iin suramsamiaji. Kajernaitsuk angkan pujustinun, anenitnun, chikich ainaujai pengker avajnalisatnun, turua ni kakarmarijai iin pengker angkantin avajtamsamiaji. Nuna iinka mash ii Apuri Jisu Kristu suramsamiaji. Kristujai pujustasrumka, nekasampita Kristu titaram. Nunia ni nemarkataram. Turuarum Kristu anetaram. Kristu nekaskepita tusar, nin namarinauka Yuse Vakani nin nekas varamtiksatatui. Ii Apuri ikia mash anemiarmi. Turua asamtai ikia Yuse anengkratairi nekau asar: Yus incha timiatrusang anenmaji, taji. (1. Juan 4:16).

Ju nungkanam timia tunau ayatrik vári Yusjai tsaningmi. Tunau arining Yus ii inintin pengker inintimias pujustas vári engkematas vakeravai. Iikia Kristujai pujustasar kintiajai metek ii Apuri Kristujai vekain armi. Ni nari pachisar varartusar, Kristunu asar, ju nungkanam aa nuka vakęrutsuk ii Apuri

Kristuk varartusmi. Turua asakrin Yus iijai tuke pujavai. Turua asar tuke Yusjai pujustatji. Iijai Yus pujachmataikia iikia mengkakatnuitji. Ju nungkanam aa nuka mash mengkakatnuitai. Turuayat Yuska tuke mengkatsuk iijai pujutatui. Kristujai tsaningkiar pujakriki chikichik namangkea nunisrik ii Apurijai pujaji. (1. Kurintiu 6:17).



Ii Apuri Jisu Kristu ni Vakani timia pengker aa nuna nangkamnak suramsamiaji. "Vina Vakantrujai Vina vakeramu-

run turuvarti, tusa turua ju nungkanmaya uvermraru asa turuvarti," ii Apuri turamiaji. (2. Pitru 1:4).

Kristu nekaskepita timi. Nijai tsaniasar pujava nunisrik nijai tuke iruntrami. Kristu nekasampita tinu ainauka pujut nangkankashtinun jukiaru ainavai. Turua nayaimpinam aa nuka tuke ninu asamtai, nayaimpinam pujustin ainavai. (Juan 6:47).


YUS SEAMI

Yusru, ameketme timia tunauringchau. Ameka Yus asam, ii Apuri Jisu Kristu Apaachirinme. Turua amesha ii Apaachirinme. Ami Uchiram Jisu Kristu vina uventikruru asamtai, vinasha anenme. Vina pengker avajtusam amesha varame. Tunau ainau vai anenmai ainavai. Ame vina inintirun pujustasam tuke vakerimiame. Ame vijai tuke pujame. Turua visha nunisnak tuke amijai pujajai. Ami Vakanmijai pujamurka nekas vi Amijai pujaja nuvaitai. Vikia ami Vakanim inintirun piatkamu atatjai. Apuru, ami anengkratairam surusta. Ami Vakanim piatkamu asan, ami vakeramurmia nunisnak atajai. Vina inintirun ame varamtikrusta. Turua inintirun Vakanim pujau nuka kanakchati, tusam vijai tuke pujusta. Vina inintirun ami pujutirmia nunismek ukurtusta. Amijai tsaniasan pujakun aminak anetasan vakerajme. Nekas amin vainkatasan ami vakeramurin turuatasan nukap vai vajaktinuitjai. Turua asa vi inintimauruka ami vakeramurmia nu ati. Yusru, vina namangkruka amek najatruamiame. Ame uventikruru asakmin, aminu aa nuka vinar atatui. Maaketai.

6. JU AINTSU ININTI ATAKSHA TUNAUN PENGKER AVAJSATAS VAKETRAVAI.

Ju aintsu inintin Yuse Vakani pujumia nuna yapi jista. Ni inintinia inital Kristu ni Vakani niya nunisang amia nuka jumchik jumchik mengkavai. Ninu inintin Yuse Vakani ji kapaava nunisang paantin etsantar amia nuka kajinui. Nuka jumchik Yuse sear, nuniangka Yuse seatsuk pujusar, ataksha Yuse sear, nuniangka Yuse seatsuk kajinmasar pujuina nu tuminavai. Nuvik Yuse nekas pengker umirak tuke nijai chichasar pujayat, yanchuik ni inintin tunau piyatkamu asar, nuni ataksha vaketkiaru asar, ataksha nunisang pujuinavai. Ni jijai ju nungkanam mengkakatini aa nuna jisar vakerinak, turua

ni vakeramurin, turua ni pengker avajeamurin tuke turinak tuminavai. Turua asar Yus vakerachmau ningki inintimias turuatin inintiminak, ii Apuri turunamurinka jumchik inintimui.



Turua asamtai jumchik jumchik ni inintinia Yuse Vakani mash ukuavai. Turua asamtai inintin ji kapaava timianu Yuse Vakani paantin amia nuka kajinui. Turua asa ii Apuri Jisusa ni Vakani ji kajintrava nunisang micha vajavai. Turuasha mukunit teenam mengkava nunisang ni Vakaningkia mengkavai. Turua asa

nuniangka ni inintijai varamurisha atsavai. Turua ataksha varukava? Tunau ataksha aintsu inintin vaketak ninu mangkartutiri takus ataksha vâri tsekengi inintinam engkematas vakeravai. Aints ni inintin Yuse Vakani timia kakaram, turuasha timia paantin ni anengkratairi atsurmau asa Yus umirmaurinja inayavai. Turua chikich ainaujai nekas anenitnasha tuke inayavai. Turua asa nuniangka tunaunum vaketui.

Inu ininti iik vakerakur ivianch tsangkatkamu asa, ivianchcha ataksha inintinam vaketui. Ninuri ainaun mash takus, turuasha tunau asa, ikiamia pachim ainava tumaujai mash inintinam engkemui. Inintinmaya Yuse Vakani jinkin asa atsau asamtai, inintinam ivianch vâri kakarmachu engkemui. Turua aints Yusen seachu asa, turuasha tunaunum vaketkin asa, nuniangka tunau nekas shamrumtin aa nuna eavai. Yuse avemamuri turuasha Kristu Vakani ivianchi juuntrin jiki akupkatas vakeravai. Turuayat aints tunau asa ningki vakerak, Yuse seatsuk pujau asa, turua Yuse vakeramurin timiatrusang turutsuk pujau asa, ni inintin ivianch engkematnun jumchik jumchik uravai. Turua nu ivianchkia engkema ataksha ni pujutirin pujus, timia kakaram pujavai. Ju aarmaunum Kristu ni aintsri ainaun chicharak timiayi: "Shintartaram. Turuaram Yus seataram tunaunum jeai tusaram," timiayi. Turuasha Paprusha Kristu inatiri amia nusha timiayi: "Tuke inaitsuk Yus seataram," timiayi. Yus seamuka Yuse umirkaru aina nuna pujutrintai. Yuse seatsuk pujamtaikia, inintinmaya mengkamtai, ni Vakani pengker aa nu mash mengkavai. Yus seamuka inu vakani yurumkan yuva nuvaitai. Yus seamujai inu vakanisha yurumkan yuvavai. Ii Yus seatsuk pujakur, ii inintin kakaichu vajakrinkia, Yuse Vakanisha inintinam puja nusha nunisang mengkavai. Ii shintarar Yus seatsuk pujakrinkia, Yus seachmin kara nukap vinavai. Turua nunia ii nemase ivianch taa, inintinam ni arakrin arava nunisang Yuse Vakani pujamunam aravai. Aintsu inintin Yuse Vakani atsau asamtai, ii nemase ivianchi juuntri Satanás nartin inintinam engkematas aintsti ininti uraimua nunisang angkantin pujaun vainui. Turua asamtai vainkataram, inintirum ivianch engkemachmin Yuse Vakani pujusti tusaram turuataram.

Kristu krusnum jakamia nu inintimsaram tuke nijai pujustaram. Turua tunau aa nu inintimin Yuse jea nunisang aa

nuni vayashti, tusaram tsangkatkairap. Turua Yuse jeen pasemamtikrai, tusaram tsangkatkairap. Ivianch Yuse jeen inintimin pasemamtikramtaikia Yus amin pasemamtikramrata-tui. Kitiama nunisrumek kanutsuk pujusrum, Yus seataram. Atumi nemase ivianch atumin achirmaktas atum pujamunam tuke ayamasa juun yavaa kajeava nunisang tentamkinij vajavai. Turua asamtai Yuse Vakaniyai nu ivianch nepetkataram. (1. Pitru 5:8)

Aints Kristu nekasampita tau asa, tuke Nijai pujustas vakerauka jimias pujava nunisang akaiki iyartsui. Atumsha nunisrumek pujustaram. (1. Kurintiu 10:12).

Turua asaram ivianchjai maniakrum, ivianch nepetkatasrum Yuse Vakani ni kakarmari jukitaram. Paprusa Ejiesunam pujuinaun tu aatramiayi. (Ejesiu 6:13-17) Turua asa versikuru 12 nuni tavai: likia maniamujai pujaji. Turua aintsjaingkia maniatjsi. Antsu ivianch ainaujai, ii jijaingkia vaintsuji nunajai, turuasha ivianchi juuntri ainaujai, turuasha pase inintimtiartin aina nujaingkia tuke maniaji. Ii ukurinini tuke iin papetmaji. Nu inintinam Yuse Vakani paantin aa nuna ikiajnartatui. Turua asamtai Yuse Vakani inintirun tuke pujus, turuasha kakaram vajas, inintirun kakamtikrurti tusaram kakaram vajastaram.

Ii Yus seakur, Jisus vina ukurkishti tusar, turua ni turuna-murisha inintimsar, nuniasha Yuse Vakani inintirun tuke pujusti, tusar ivianchi vakeramuri inintimsuk pujakur, Yuse kakarmari-jai ivianch nepetkatnuitji. Ii tunau jiti inaiyakrikia, nuniangka ii Apuri nuke jisar pujaji. Ii tunau inintimtai inaiyakrikia, nuniangka Yuse Vakani kakarmachu vâri nekaji. Turua Yusjai pujava nunisrik inintimji. Yus tuke seakur, ni jintin tuke vekakur, turua ni jinti nekaskepita takur, nuniasha Yuse Vakani timiatrusrik inintimtakur Kristu inatiri vajaji.

YUS SEAMI

Apuru, ameka aintsu inintisha mash nekame. Ame vinasha inintimtursamiame. Turuasha vaitkamiame. Ame vina inintir tuke ayamtsuk tunau inintimaurusha vaitme. Amin inintimsuk pujaknak vâri mengkajai. Turuasha kakaichu vajajai. Ameka Apuru timia tunauvaitjai, nusha anangkartuti mash nekarme. Nu tunaurun varing achat mash vi turutirun itur nepetkatatja?

Ami Vakanmijai uventikruram angkantin avajtusta. Turua asan ami Vakanmichujaingkia vikikia vina takatrun takastatka-mancha pengke uyumatajai. Ami uvejmiyai tuke achirkata. Yusru, ameka vina Yusrinme. Ame tuke inintimtursata. Vi inintimauruka ami vakeramuram ati. Vi inintirun ami Vakanim paantin aa nu tuke mengkakashti. Inintirun katsuram inintimau atsuti. Inintirun kintiajai metek tuke kakamtikrurta. Vijai tuke chichasti, tusam inintimtikrurta. Turua yamaram varamu nekamtikruata. Turua amin pujustasan vakerajai. Turua kintia metek ami kakarmarmin nekatasan vakerajai. Tuke varasan kintia metek ami Vakanmijai pujustajai. Ju nungkanam pase aa nu jisar vakerutirka mash ajaprutata. Maaketai.

7. AINTS YUSE UMIRKAYAT, ATAKSHA NINGKI ININTIN IVIANCHIN TSANGKATKAU ASA TUNAU VAJASMAURI.

Juka aintsu tunau inintintai. Nuna pachis Kristu timiayi: "Aintsu inintinia ivianch jinkin asa, pengkernum pujustas pengker pujusminun eaknij vajavai. Turua pengker pujusminun vainchaka ataksha inintimui: Ataksha vina jearun vaketkitajai. Nuvik pujayatun jinkimiaja nuni vaketkitjai, tusa inintimui. Turua ataksha vaketki aintsu inintin angkan jea japimkamu shiiram puja nunis pujaun vainui. Turua nuna vainak, ataksha ni aintsri atu uvejen jimiaran iruk nekas pase aa nuna juki inintinam vinavai. Turua mash aintsu inintin pujusartas engkeminavai. Turua asamtai nu aintska inintin ataksha ivianch piyatkamu asa, nuvik tunau pujumia nuna nangkamasang nekas tunau vajavai." (Rukas 11:24-26).

Chaa, nuka timia shamrumtinitai! Turua auni aintsu inintin ivianchi juuntri Satanás nartin ni ekemtairin ataksha apua nuni-sang eketui. Nuni pujus, ni aintsrin tuke inavai. Turua aintsu inintin Yuse Vakani vayavai, tusa tuke nepeteavai. Turua tunau yanchuik inintinmaya jinki veamia nuka turuasha tunau inintinam tsuimiar, turua muimiar pujumia nuka ataksha inintinam vaketki pujavai. Inintinam ivianchi inatiri ainau ikiamia pachim irunina tumau ainauka yanchuik pujutirin ataksha vainui. Turua asa tuke ni jeen pujuinava nunisarang pujuinavai. Turua asa tuniaya nusha vinava? Aints tunaunomia uvemrayat, Yuse Vakani anechu asa, Yuse Vakanin avaingkimi-ayi. Turuasha Yuse Vakanin tuntupea ukuavai. Turua asa ni tunaunin Yus japiramia nunasha kajinmavai. Ii vainkar

Aintsu inintin tunau puja nuningkia Yuse Vakani nekas pengker aa nuka pujatsui. Turua asamtai itur Yuse Vakanisha ivianchi vakanijaisha tsaniascha inintinmasha pujustatua? Turuasha inintisha Yuse jee ayatcha, itur-ataksha ivianchi jeesha atata?

Yuse avemamuri Yuse Vakani timia pengker aa nuna sukartin aa nusha nu aintsun jis vake mesek pujavai. Turua chicharkatas tavai: Angkantin pujustin turuasha nekas verastin vainkatasam vakerakmeke kakaram vajasta! Apurmi Jisu Kristu vini viniti tusa tuke nakarmavai. Ataksha vaketkita, yuschau vainiatum nekasampita tame nu yamaikia tutsuk inaisata. Aintsu ami Apuram nuke tita. Turuakmeke Yuse anengkratairi vainkatatme, tavai.

Turuayat aints pengke antatsui. Ni jijai jis ju. nungkanam tunau aa nuna tuke mash vakeravai. Turua tunau timia natsanpiaku turuayat pengke natsamatsui. Turua asa nunia Yus kajerkamu asar, nukap vai vajakartin ainavai. Mengkakatnunami veayat vikia mengkakatnunmapi veaja tusa pengke nekatsui. Turuasha ni inintin tunau tsutmai piyatkamu puja nunasha nekatsui. Inintin ivianchi juuntri Satanás nartin piyatkamu asa tumavai.

Ju nakumkamunam itur ava tusam jisja. Anetair amikur ainautiram: Atumi pujutri tunaujai vai vajamuri Yus umirkuram Yus tsangkuotrurti, tusaram inaisau ayatrum atumi ininti yamaikia ivianch tsangkatkairap. Aintsu kakaram vajasrum, nu tunauka ajapataram. Yus pengker umirkayatam ataksha tunau vajakmeke, yanchuik tunau amiame nuna nangkamasmek nekas juun tunau vajastatme. Ivianchi juuntri Satanás nartin ataksha inintimin engkemangka, nuvik kakaram amia nuna nangkamasang nekas kakaram vajavai. Turua asam ameka ivianchi aintsri turua nekas ivianchi inatiri vajame. Turua asam tunaunum ataksha iyarai tusam vainkata. Ameka Yus umirkam ni Vakani jukimiam. Tunausha ukukim, kajernaitai-

sha inaisam, varing achat mash ni nemase vajasam inaisamame. Turua asam yamai inintirun tunau pengke vayashti, tusam vainkata. Turua asamtai nu tunauka shamkam tuke inaisata. Turua ataksha tunau vajakmeka, nuviki tunau amiame nuna nangkasmeka timia tunau vajastatme. Turua tuke Yus seata. Yusek timia tujinkachu asa, ami nemasem nepetkatnun ni Vakanin suramsatatu. Vait vajakum akaikim iyarmesha vári nantakta. Turua nantakim ivianch Yuse Vakanijai nepetkata. Turua Yuse Vakani amijai puja nu ivianch tsangkatkaip. Antsu ami uvejmiyai ami Apurmin achimkam kakaram vajasta. Turua asa ami Apurmikia tuke yainmaktas vakerutmavai. Ni uvejejai amin yainmaktas tuke ukurmatsui. Amin yainmaktata nu nekas timia kakarmaitai. Ivianchi kakarmarincha ni manitirincha mash nepetak aminka angkantin avajtamsatatu. Inintim Yuse jee amataikia, itur ataksha ivianchi jee ati, tusamsha tsangkatkatnuitme?

YUS SEAMI

Yusrú, amekitam vina Yusrú? Turuasha amekitam vina Apaachirú? Yusrú, vikia ame najanamuitjai. Turua ame najatamiame. Turua asan vikia aminuitjai. Apuru Jisusa, ameketme vina uventikrurtin. Turua ame Yuse Vakanisha nekantikruam, tunausha esakturam angkantin avajtusam, ami Vakanim surusmiame. Ami Apaachirmi untsurinini pujame. Turua ami uvejmin timia kakaram avai. Nujai ivianchi kakarmarinia uventikrurtin avai. Ivianchi inatiri amataisha ami kakarmarmijai uventikrurtinuitme. Turua asam aints tunau vajasar, tunaunum vearmia nuka ataksha vini viniarti, tusam pengke kajertsuk juvame. Juni Apuru pujusan amin untsuakun pujajai. Ami Vakanim akupturkata. Ameka mash uventikiarturtasam vakerame. Timia juun tunaunumia jinkichmin pujakrin chikichka jirmakchatnuitji. Antsu ameka nu aintscha ajapam ukuatsme. Ivianchi kakarmarinia turua tunaunumia vári jirkita. Turua inintirun tunau yamaikia pujuschati. Vina inintirka aminu ati. Ami numpemjai akimiakmame nuka aminuitai. Turua asam ivianchin nepetkarti, tusam ami paanurmisha tuke akupkata. Ami Vakanim surusta. Ivianch vijai pujau tuke tupikiakti. Ame ivianch nepetkau asakmin,


yamaikia kakarmarisha mengkatkata. Ame angkantin avajtusta. Maaketai.

8. TUNAU AINTS JAKAMU TURUASHA TUNAU AKIMIAMURI

Namangnum turua inintinam ivianchi vakani piyatkamu asa, vaij vajaktinnum veavai. Turuasha ni nemase untsuri ainau achikmau asa, uvemrachmin tuke vaij vajaktinnum javai. Yuscha ukukmiayi. Ni Vakanisha ukukmiayi. Turua asa uvemrachmin pujavai. Kristu inintimtichu asa, turua Yuse seachu asa tumavai. Varing achat, pase inintimikiartincha, vaij chichaman inintimikiartincha, mash ni vinitinavai. Yanchuikia Yuse chichame umirak pujumiayi. Turuasha ni varinchurin akikrin takus nekas pengker iviarmamar, tunau vainiat, pengkeraitai tinu ayayi. Turuayat yamaikia ivianchi pujutirin nekas vaij vajaktinuitai, tusa nekavai. Yanchuik tunau turuamurin inintimias vaij vajavai. Turua ni vakeramurin inintimias, nuka jakatnunam vaij vajaktinnum turuasha jutsar pujutnunam jeavai, tusa inintimias tuke vaij vajavai. Ni pujamunam varamuka atsaun jiavai. Turua ni vaij vajamuri angka pujustinasha vaintsui. Antsu nekas vaij vajaktinnum timia shamrumtinnam pujavai. Turua nuvik Yuse umirtsuk turuasha inintimtsuk pujuya nuna yamai shintarua nunisang inintimui. Turua jinam pujau asa, tuke jijai esak vaij vajavai. Inintin katuram asa, Yuse umirtsuk puju asa, tuke nukap musach pujaksha, tuke inaitsuk vaij vajavai. Turua Yuse chichamen antutsuk kuvishi jampekua nunisang nakitiat pujusu asa, timia vaij vajavai. Turua asa Yuse chichame antuktakama nuningka tujintavai. Turua nekas ivianchnau asa, timia pase asamtai, Yuse umirtsuk nakitnunka Yus tu ajapa ukuavai. Turua Kristun nakitiat, ni chichamencha nakitramia nuni uvemratas vakeravai.

Kristuncha nakitramiayi. Ni Vakanincha nakitiat, ni jakamurincha antukiat, antutan nakitramiayi. Turua asamtai nuniangka Apu Jisus nincha titinuitai: "Vina chichamur antukiatum, nakitruru asam, yamaikia jinum pujusam tuke vaij vajaktinnum veta," titinuitai. Nu jinum pujusar, vaij vajamu tunau akimiakur vaijnastinuitai. Nuniasha varing achat, ju nungkanam tunau ainau Yuse nakitin ainau turuasha nayaimpinmaya ivianchi juuntrin jiki ajapamia nuna vaij

vajaktinuitai. Nuka aints pase initintin ainaun jinum tuke pJustinun Yus ajapamiayi. Nuni pujusar, jikia pengke kajintrashitnuitai. Turua nuni pujusar aka iruntrava nunisrik vait vajakrishia pengke jakashitnuitai. Nuni pujusar tuke jutmau turuasha vait vajamu, nuniasha nai esair nukap jutmau atatu.



Cha, varutmak nu vait vajaktinnum aints venava? Varutmak Kristun umirnuitjai, tayat tunau tuke turuatas vakerek,

natsanpiaku aa nuna turinak, turuasha vikia timiajuitjai, tinausha pase aa nuna turinak, pase inintiminausha, vaitan chichainausha, vaitan inintiminausha irunua! Turuasha ni tunaurin tuke Yusen ujainatsuash. Turuayat Yus nekas tunaurun tsangkuturuti, tusar turinatsui. Antsu Yusen inintimsuk tuke ni turutirin turinavai. Turua asar tunau jintining tuke vekainavai. Turuasha tu pujuinau asar, nuvik tunau amia nuna nangkamasang tunau vajak, tuke nangkamiar: Yus tunaurun tsangkuturuti tusar, tunaurin etse etserka ni inintincha yapaijsuk jakatin kintarin jeainavai. Turua asar ii Apuri Kristujai pujusartas venatsui. Turuasha Yus seatai jeanam vayavar, Yuse chichamen antin ainayatang, ininti katsuram asar, nuniasha Kristu numpen pachisar Yuse misarincha yu ainayatang, ininti katsuram asar, tuke tunau aints turuasha ivianchi juuntri Satanás nartinu inatiri ainavai. Turuasha Yuse vakanin uyumachua nunisang inintimui. Turuasha nekas nunisang vaitrayat chichavai. Tu pujai nuniangka aneachmau jakatatui. Turuasha ii Apuri aints ni arakrin juktas vinava nunisang nekas ni aintsri ainaun jistas turua tunau ainauncha mash jistas vinitatui.

Nuka Kristu pengker chichamen antukariat tsutramiayi. Turuasha Kristu nekasampita tichamiayi. Turua asa nu aintsu vait vajaktintrintai. Nu aints ainauka Kristu chichamen emkar antukariat, Nincha nakitiat ju nungkanam tunau aa nunak tuke inaitsuk turuamiayi. Turua asamtai Yuse chichame nuna pachis tu aarmavaitai: "Kristu pengker umirkayatrik, ataksha tunaunum veakrikia, nuniangka ataksha inintimau yapajiatkamar pengke tujintaji. Turuasha Kristu chichamen umirkayat, ataksha ivianchnau vajas, ivianchi vakeramurin turuau asa, Yuse Uchirin mava nunisang nekas tunau vajavai." (Epréu 10:26; 6:3-6).

Turuasa tunau ainautiram, atumi turuamuri timia pengker inintimrume nu turuasha tuke umirkuram pujarme nu inintimrataram. Ukunam nuka atumin vaitkarmatin ainavai. Turua asamtai atumi umirmauri nekas pase aa nu inintimraram tunau inaisataram. Vait vajakai tusaram, pase aa nu inaisataram. Nuka vait vajaktin jintanam turuasha mengkakatin jintanam vetatrame.

Jisu Kristu chichame antuktaram. Atumin untsurmak tavai: "Vini vinitaram. Vina numparun nukap numparmiaja nunajai atumi tunauringha nijatratatjarme. Turua atumi tunauringha mash tsangkuratatjarme. Vina nemartin ainaunka vina pujutrun tuke pujustinun susatatjai, "ii Apuri Jisus tavai. Turua asamtai ii Apuri chichame antukrum inintimin katuram inintimsaram pujusairap. Turuasha nu antukiatrum antsu nekasnaka chikich kintatai umirkatjai, tirap. Turua nu antukchau akurminka ii Apuri vina, tunau turin ainautiram, yamaikia vait vajaktinum jinum vetaram, turamtatji. Timia vait vajaktinka Yus nakitrau asar vait vajaktinuitai.

YUS SEAMI

Yusru, ameketme tunauringchau. Turua ami inintimaurumsha timia metekaitai. Aints ami umirtamin ainau chikichik chikichik ami pengker Vakanim suvame. Turua tunauringha inaitan nakitinauka turuasha ami chichamin inintimsar pujuchu ainauka ame pujamunam pengke jeachartinuitai. Antsu tuke jakatnunam pujusar, tuke musach venaksha vaitnasar pujusartatui. Timia pengker inintimsam ami umirtamkau ainaujai pujakim, tunauringha inaitan nakitinauka nekas vait vajaktinum ajapatatme. Apuru, ameketme iin uvemtikramratin. Turuasha jakar vait vajaktinum jinum vetinum pujau asan, vaitnasan pujai, ame uvemtikrumame. Ami kakarmaram surusta. Inintirnia tunau mash jinkiti. Turua tuke aminu atatjai. Turua nu tunaunumia jinkin ami Vakanim jukitjai. Inintirun kakarmaram surusta. Yamaram akinava nunisang inintirun ati. Turua nuka tuke aminu ati. Maaketai.

Varimpita pujut timia pengkersha? Nase veka nu timia juun ayatang vainchau asar inintimrachminuitai. Turuasha nase nukanam achimiak nuni pujatsui. Varimpita pujutcha? Yurangkim yaki veka nu turuasha kakara vainchamaitiat, turuasha iisha vainchayatrik nekaji. Turua visha vina pujutur amukamtaisha yanava atatja? Varukatnuitja visha? Ame Yus asakmin, amin eaknaka, Vakanim vijai pujustinkai?

9. YUS SHIVIAK NI ININTIN YUSE VAKANI PIYATKAMU ASA ITUR PUJAVAKA?

Ju nakumkamunam aints Yuse umirkau ininti itur ava tusar unuimijai. Yuse umirkau inintin tunau ataksha engke-natas nin

ayamrus mash tenteavar pujuinavai. Ivianchi juuntri Satanás nartin, nuniasha tunau ainau ninurin takusar, yanchuik pujutirin viniartas tuke mash jirmaji. Turua Yuse umirkau inintin vakan pase ainaun shamrumtin ainau, Yusen pase chicharin ainausha turua chikich ivianch tsekengki vekain ainausha mash inintinam engkemavartas vakerinavai. Turua asamtai Yuse umirkau ainauka nu ivianch tuke nin tenteavar pujuina nunajai tuke maniak Yuse kakarmarijai nepeteak pujustinuitai. Aintska tunauijai turua ivianchjai tuke maniak pujavai. Turuayat Yuse umirkau asa, inintinkia Yuse kakarmari piyatkamu turuasha Yuse Vakani piyatkamuitai. Turua asamtai ivianchkia nepetkatatkama pengke tujintavai.

Turua yakinini nakumkamunam Yuse avemamuri tuke nincha ukutsuk yaintas kakaram vajas ivianchjai maniak, ivianchin nepetkati, tusa nincha tuke chicharui. “Turuasha tunaun nepeteava nuka tuke Yus pujamunam uvemratatui.” (Mat. 10:22).


Yuse umirkau inintin paantin vincha nekas shiiram etsantar; nuka Yuse Vakani inintinam pujus tunaun nepeta nuvaitai. (1 Juan 5:4).

Turua asa Yuse aintsri Yuse kakarmarijai mash aa nuna turuatnuitai. Ni Vakanin suramsau asamtai, Yus maaketai titaram. Yachia iincha Kristu Yuse Uchirijai pujakrincha, nunia jirmaki akuptamkatnuitji? Turuasha yachia Yus iijai puja nuna juramkitnuitji? Ii Apuri iin anenmak nukap vaitnasmia nuna kakarmarijai iturkachmin aa nusha mash nepetkatnuitji. (Rumanu 8:35-37). Yuse anengkratairi inintinam pujau asa, Ni Vakani nekas pengker aa nuna timiatrusang sukartavai.

Jisusa naari aarmau vainkata. Jisus vina anetairuitai. Jesus chichaak: “Vikia atumi namangke kakaram vajastasrum yurumak yuvarme nunisketjai. Vini vinina nuka tuke yapartsuk pujustatui. Turua vina nekasampita turuta nuka tuke kitamtsuk vijai pujustatui,” timiayi. (Juan 6:35).

Ju tuke pujutan sukartavai. Turua ni inintincha tuke kakaram vajavai. Turua Yuse kakarmarincha nukap juvavai. Nuniasha pujut tuke nangkankashtinun juvavai. “Vina nekasampita tusa vina namangkrun pachis yuva nuka turua vina numparun pachis uma nuka pujut nangkankashtin aa nuna juvavai.” (Juan

6:54).. Nuniasha nekas pengker inintinam Kristu krusnum jakamia nu pujavai. Nuniasha ivianchjai maniak ivianchin nepetkati, tusa Yus nin susamia nu kakarmarisha ivianch nepetkatin avai.



Chikichik Yus seatai jea aints tuke inaitsuk Yuse seavai tusar, vainji. Turua asa nunisang ningkisha, ni jeencha, tuke inaitsuk tuni vekava nunisha Yusjai pujau asa, Yusjai tuke chichavai.

Turuasha tuke varas kintajai metek ii Apurijai vekavai. Yuse seatsuk pujauka tunaun nepetkatatkama pengke tujintavai. Turuasha Yuse Vakanin jukitatkama pengke uyumatavai.

Kuik chumpiamu ta nunaka Yuse timiatrusang umirkava nuna, ninisha chikich ainaujai timia pengker inintimtunisar pujuinavai. Turua chikicha uyumamurincha pengker inintimsar suvinavai, nuna tavai.

Yuse chichame aarmau nekas timia pengker Yuse Vakani uyumatsuk pujustin, turua chikich ainausha nekas varamtiksatina nuka tuke pengkeraitai.

Tanta turua namak ta nuka aints rampetan inintimtsuk, yutanak yuvar, pengker pujuinavai. Turuasha yurumkan yuvar, kakaram vajainavai. Antsu nampen ainou tuminatsui. Turua asamtai Yuse umirin ainou nampetnasha inintimtsuk turuasha ii namangke vakera nuna inintimtsuk yutan yuvaksha, umutin umaksha nampekchatnuitai. Turua asar Yuse aintsri ainou Yuse Vakanin jukiaru asar, ivianchjai maniakur kakaram vajastinun tuke jukiaru ainavai. Turua asar ivianchjai maniakur nepetmaktintrin Yus.susamun takusar vekainavai. Turua asa tuke ninu inintin Yuse Vakani pujutiri ainavai. Turua ni nemase ainauncha tuke nepetinavai.

YUS SEAMI

Jisusa, vina anetairu! Amin pujaknaka varing achat mash nungkanam aa nunasha vakerukchatatjai. Amijai pujachkunka viki vina takatruncha turuatatkaman pengke tujintajai. Vina vakanur tuke iviaku avajtursata. Ameketme nekas paanum! Ami kakarmarmijai varing achat mash tunau aa nunasha nepetkatnuitjai. Turua inintirun varamtikrusta. Turua tuke nungkanam pujuina nusha aminak mash anenmiarti. Ami pengker Vakanim timia paantin aa nu chikich amijai metek atsavai. Nu pengker pujutka amining pujavai. Inintirun Vakanim pujau asamtai, amijai tuke tsaningtatjai. Ami chichamuram timia kakarmaitai. Turuasha tuke pujutan sukartavai. Ame inintirun pengker inintimtikurta. Turua kintajai metek ivianchjai maniakun ami kakarmarmijai ivianchin nepetkatjai. Vina inintirun tuke mash inintimtairusa ami vakeramuram ati. Ame yainkata. Tuke inaitsuk amijai chichastasan vakerajai. Turua ami kakarmarmijai kintajai

metek ivianchjai maniakun, turuasha tuke nepetkan amincha varamtiksatatjai. Maaketai.

Ii Apuri Jisusaitai. Ni chichame antukta. Jisus ni ekemtairin nekas paanunam ekemas, nekas kajechu asa, turuasha timia anengkratin asa amin yamai turamui: Vina anenmek? Tunau inaisaram vina aujtustaram. Ivianchi kakarmarijai jingkiama nunisrumek pujarmin Vi atiamiajrume. Atum tunau asaram, charumakua nunisrumek vaitnasrum pujamurmincha Vi tsuvarmiajrume.

Pujutnum jeatin jintanam jeamiajrume. Tunaujai pujakrum, teenam pujamurmincha paantin avajsamiajrume.

Nuva ni uchirin nu nangkamtaik emak jerermia nuna kajinmaktinkai? Atumi inintinia pase aa nu jiktaram. Turua vikia atumin pengke kajinmachatnuitjarne.

Vina Vakanruka nekas vait vajaktinasha sukartichuitai. Vina pujutruka mura jaki vajaku aa nuna nangkamasang nekas juuntaitai. Turuasha juun muranam vakar, nungka jimiam nekas arak aa nuna nangkamasang nekas yakiyaintai. Vaitnasam jakamsha, angkantin tuke Vijai pujustatme. Yaki pujusam, vina paanur vainkatatme. Yamaikia Vi pujamunam Vijai tsaniasam pujusta, tajame. Vina anenmek? Tunau amataikia, vijai chichasta. Apuru, vina kakarmarka timianchavaitai. Vikia tunau asan, turua timianchau asan, najaimiava nunisnak vait vajajai. Turuayatun amincha aneajme, turuasha: Ameketme juuntam, tajame. Apuru, kintajai metek inintirun Vakanim piyatrukti: Maaketai.

10. YUSE AINTSRI TUNAURINCHAU JAKAMURI

Aints Yuse umirak tunau inintimsuk ni Apuri vakeramurin timiatrusang umirak pujumia nuna yamaikia varasar pujustin kintari jeayi. Nayaimpinam pengker inintimias pujustas, jakar tepamurin yamaikia ukuavai. Ju nungkanam aa nunasha vait vajaktin juni aa nunasha yamaikia pengke pachiatstui. Turua nayaimpinam veamtai, chikich ainu nin maijnakartatkama pengke tujinkartatui. Turua asamtai Jisusa chichamen tu aarmiayi: "Vina chichamrun antuk, turua vina Apaachirun nekasampita tauka pujut nangkankashtinun juvavai. Turua vait vajamurisha atsutnuitai. Jakar vait vajaktinnum pujumia nuka yamaikia yapajia yamaram pujutan juvavai." (Juan 5:24)

Auni nayaimpinam Yuse umirkau pengker inintimias tunauri tsangkuramu asa, ni Apurijai pujavai. Yamaikia Jisu Kristu krusnum jakamia nunau vajasi. Ju nungkanam pujus tuke nin umirak pujusmia nuni yamaikia ayamak pujavai. Kristu umirak pujusu asa, jaksha Kristunu atas javai.



Yuse umirkau turuasha nekas varas pengker inintimias jakamia nuna yapi tuke Yuse paanurijai pujavai. Yuse

Vakanisha ni vaitnas pujaun nekas pengker inintimtikramia nusha tuke nijai pujavai. Nayaimpinmanini jimias, ni inintimaurisha nayaimpinam veavai. Turua ni Apurin tuke chichaavai: “Jingkiama nunsnak pujayatun, yamaikia atiamu pujustasan vakerajai. Turuasha Kristujai tuke pujustasan vakerajai.”

Yuse avemamuri Yuse aintsri jakamia nuna nayaimpinam Yus pujamunam jukitas tuke nakaj pujavai. Yuse aintsri ju nungkanam pujus, Nin nekaskepita tusa, tuke umirak pujusmia nunajai ingkiuniktas Yuse kakarmarijai nanami nayaimpinam veavai. Ju nungkanam pujus Nincha vainchayatang, tuke nakas anemiayi. Nujai ingkiuniktas veavai. Turua yamaikia nekas varasar pujustinun Ni aintsri pujutirin suvavai. Nekas varamu avai. Kristujai ingkiunikiar yapi jirsatin, turua varukuita tusar, ii Apuri vainkar, ninu paanurin tuke pujustin nekas pengkeraitai. Yachia ii Apuri Kristujai pujakrin pase avajtamsatnuitji?

Yuse umirkau tu jainavai. Kristu nekasampita tauka tunaujai vai vajayatang, turua ivianchi juuntri Satanás nartinun nepetkauka ni kintari jeamtai, nekas varamurijai turua ni Apuri pengker avajsamu asa, ni Apuria nunisang Nijai tsanias pujustatui. Turua asar Yuse aintsri ainauti tsererach jintanam vetasar, kakaram vajasar ivianch nepetkarmi. Nayaimpinam Yuse paanuri nakarmaji. Nuniasha Yus iin suramsatin aa nu turuasha pengke mamurchatin aa nu iin nakarmaji.

YUS SEAMI

Apuru Jisu Kristu, jakan tepaknasha aminu asan, turua inintirun ame pujurtau asakmin, amijai pujustatjai, tusan inintirjai nekas varastatjai. Amijai pujamtaikia, yachia vinasha jirki ajapruatnuita? Ame vina turauruka tsangkuturumame, turua tunaurchau avajtusmame. Inintirka ami numpemjai nijiatrukam, nekas shiiram avajtursamame. Turua asamtai ivianchi juuntri Satanás vina jirkitnukai? Atsa, taja! Ame ivianchkia nepetkam, ni kakarmarisha mengkatkamame. Turua asamtai ivianchkia vina pengke nepetukchatatui. Turua asamtai ameka vijai tuke pujame. Turua nuniasha ameka vina uventikrurtasam jarutrukumame. Turuasha ataksha nantakmiame, turua yamaikia ami Apaachirmi untsurinini

ekemsam vina pachitsam ami Apaachiram tuke seame. (Rumanu 8:34).

Amin umirkan jakan amijai pujamtaikia, chikich ainau vina pengke jirkishtinuitai. Turua asamtai yamaikia vina nekas anetairu Jisus, yamaikia jakan aminu jakatjai. Ami Vakanmijai kinta metek pase aa nuna nepetkatjai. Vina inintir angkantin avajtursata. Nayaimpinam pujame nunismek inintirun pujusta. Ju nungkanam pujaja nunisang inintirun Vakanim tuke pujusti. Ami Vakanim timia pengker aa nu kintajai metek inintirun piyatrakta. Ami kakarmarmijai takatruncha tuke turuatatjai. Turua ukunam vi takakmasmiajana nuna neren vikia juktinuitjai. Turua ami anengkratairum ami Vakanim uyumamu achati. Antsu ame kakamtikrurta. Aminak: Ameketme pengker, tusan turuasha amin: Nekasampitai, titatjai. Turua ami turunamurmi, ami jakamurmin turuasha amijai pujasar nekas jakashtin aa nuna inintimsan: Ameketme iin uventikramratin, titatjai.

Apuru, ameka vina uventikrurtasam vina jarutrukmiame. Turua yamaikia tuke jatsuk iviakuitme. Maaketai.

Yamai ii Apuri iin turamji nu antukta: Kristu nekasampita tusar tuke ni naarin pachisar jakarmia nuka nekas ii Apurin timia pengker inintimtikui. Ni namangke jakatatu. Turua vakanikia jatsui, antsu kanavai. Ni namangke jaka tepa nuka aya namangkentai, antsu ni vakani ayamak tepau asa, jatsui. Jisusan inintimsar jakarmia nuka nekas Jisus pengker avajsamu ainavai. Turua nuni Yus pujamunam pujasar varamu nukap atatu.

“Tuḡaunum veram tusaram, Yus atumin yainmaktinuitrume. Turua Kristu vantinkamta, Yus pujamunam tunarinchau varastaram tusa atumin nukap varamtikramsaturume. Yus chikichkitai. Ii Apuri Jisu Kristu iin jarutramkau asamtai, Yus iin uventikramramiaji. Niin nekasam ameketme pengkeram, titinuitji. Turuasha: Ameketme nekasam juuntam, titinuitji. Turuasha: Ameketme nekasam kakarmam, titinuitji. Turuasha: Ameketme nekasam ii Apuri, titinuitji. Yanchuk nungka najantsaing Yus pujuyayi. Yamaisha nunisang pujavai. Nuniangka tuke nunisang pujustatu. Maaketai.” (Jutas 24,25).

A SPECIAL WORD FROM ANGP
UN MONDE SPÉCIAL DE L'ANGP
UMA PALAVRA ESPECIAL DA ANGP

This booklet "The Heart of Man" is available in over 538 languages and dialects spoken throughout the world (Africa, Asia, The Far East, South America, Europe, etc.) Our Heart Book is now also available on cell phones, tablets, etc from www.angp-hb.co.za or as an APP "Heart of Man" on Android phones.

Le livre du "Coeur de l'homme" peut être obtenu en plus de 538 langues et dialectes parlés dans le monde entier, à savoir: Afrique, Amérique, Asie, Extrême Orient, Europe. Notre Livre du Coeur est maintenant aussi disponible sur votre Téléphone cellulaire, plaques, etc. de www.angp-hb.co.za ou comme une Application "Heart of Man" sur téléphones Android.

Este livro "O Coração do Homem" é obtido em mais de 538 línguas e dialectos falados em todo o mundo, a saber: (África, Ásia, América do Sul, Extremo Oriente, Europa, etc). O nosso Livro O Coração do Homem também está agora disponível em telefone celular, tablets, etc. de www.angp-hb.co.za ou como um aplicativo "Heart of Man" nos telefones celulares Android.



The 10 heart pictures contained in this booklet are also available in the form of large coloured picture charts (86 x 61cm) bound together in a set of 10 pictures. These "Heart Charts" can be obtained with European or African features and are particularly suitable to be used in conjunction with the Heart Book for class-teaching, open air evangelization etc. Kindly contact us to ascertain the latest subsidized price of this chart.

Les 10 images du coeur qui figurent dans ce livre peuvent être obtenues en tableaux de couleur, format 86 x 61 cm, avec des physionomies européennes ou africaines. Ils peuvent être utilisés en même temps que le livre du coeur pour des classes bibliques, a

l'ecole du dimanche ou lors de reunions de plein air. Soyez aimable de nous contacter pour assurer les derniers prix en cours du tableau.

As 10 imagens do coracao, contidas neste livro podem ser obtidas num conjunto de 10 imagens em colorido no tamanho de (86 x 61 cm). Estes "Cartazes do Coracao podem ser obtidos com caracterfsticas Europeias e Africanas e podem ser usados em conjuncao com o mesmo livro em classes de ensino biblico, evangelizacao ou ao ar livre. Agradecemos que nos contacta- se para confirmacao do ultimo preco dos cartazes.



Kindly write to us if you are able to assist us with further translations of our free Gospel literature, informing us of the language into which you could translate this Gospel literature. Your assistance would be appreciated.

If you have found salvation in Christ, or have been otherwise blessed through our Gospel literature, please let us know. We would like to thank God with you, and remember you further in our prayers.

Nous vous invitons a nous contacter pour faire des arrangements concernant de nouvelles traductions de notre litterature, nous informant de la langue dans laquelle vous pouvez traduire cette litterature evangelique. Votre aide sera beaucoup appreciee.

Si vous avez trouve le salut en Christ ou si vous avez ete beni par notre litterature, nous vous prions de nous le faire savoir. Nous aimerions remercier Dieu avec vous et prier pour vous.

Nos vos convidamos a nos contactar, afim de fazer qualquer arranjo concernente a novas traducoes de nossa literatura em outras lnguas. Vossa assistencia sera muito apreciavel.

Se tem encontrado a salvacao em Cristo, ou se tem sido abençoado por intermedio da nossa literatura evangelica, faca o favor de nos

informar. Pois nos gostaríamos de agradecer a Deus juntamente convosco, e lembra-lo sempre em nossas oracoes.



For free Gospel literature, books and tracts in over 538 languages, write to:

Pour obtenir gratuitement de la litterature evangelique, des livres et des traites en plus de 538 langues, ecrivez a:

Para obter gratufamente a literatura evangelica, livros e folhetos em mais de 538 lnguas diferentes escreva para:

E-MAIL: info@angp-hb.co.za
info@angp.co.za

ALL NATIONS GOSPEL PUBLISHERS

P.O. Box 2191

PRETORIA

0001

R.S.A.

A Gospel Literature Mission financed by donations
Une Mission de litterature evangelique financee de dons
Missao de literatura Evangelica financiada por donativos

(Reg. No. 1961/001798/08)